

四庫全書

集部

欽定四庫全書

集部

忠靖集卷一至三

詳校官編修臣裴謙

中書臣劉源溥覆勘

總校官庶吉士臣何思鈞

校對官助教臣胡子襄

謄錄監生臣孔繼峰

欽定四庫全書

集部六

忠靖集

別集類五明

提要

臣等謹案忠靖集六卷明夏原吉撰原吉字

維詰湘陰人以鄉薦遊太學選授戶部主事

官至戶部尚書謚忠靖事跡具明史本傳原

吉詩文集六卷載於明史藝文志與此集卷

數相合蓋即舊本後附遺事一卷為其孫廷

章所輯刊板久佚此本乃

國朝康熙乙酉潘宗洛提督湖廣學政時得其  
裔孫所藏重為校刊前有楊溥序稱其詩文  
平實雅淡不事華靡雖原古以政事著不以  
文章著洪永之際作者如林固不能與宋濂  
王禕諸人齊驅方駕然致用之言疏通暢達  
以肩隨楊士奇黃淮等殆可無愧色矣乾隆  
四十三年六月恭校上

總纂官

臣

紀昀

臣

陸錫熊

臣

孫士毅

穀

總校官

臣

陸

費

桴

欽定四庫全書

提要

忠靖集原序

少保兼太子太師戶部尚書長沙夏公詩文遺稿常州太守桂林莫君子朴以其俸餘餼梓公之子尚寶司丞瑄請予序公之德存乎人望隆一時有以服人之心感人之情況所寓諸詩文皆本學問亦不可泯也公儒家子天性明敏而溫厚加以詩書涵濡之以成其器在邑里時即有善譽洪武中由鄉薦入太學試地官屬各司疑難往質問之而悉以理折衷不以利害為心遂有聲

於朝未幾自部僚超拜亞卿尋陞大司徒經賦之政寬而有制國用以克民不告乏遂馳聲於天下立朝四十年餘每議大政務從寬厚處同官未嘗失色待僚屬取其所長略其所短以是人多德之宣宗皇帝為皇太孫時公受命輔導三朝實錄皆預監修公於理有定見故其所行夷險無間人以為難列秩六卿位次三公人不以為過時論朝之大臣有德量者以公為冠卒之日朝野惜之追贈太師謚忠靖錄用其子此其始終大概也



詩文平實雅淡不事華靡觀者亦可想見其為人也  
公在永樂中攝冬官政子朴嘗為冬官郎中相知為深  
在常俎豆之事則有司存子朴歷官已四考政和民決  
用心於此良厚矣又能使公詩文得傳聞於人殆知言  
者哉予亦湖湘人嘗得與公同事用是書之簡首云正  
統八年歲次癸亥春二月穀旦光祿大夫柱國少保禮  
部尚書兼武英殿大學士國史總裁同知經筵事南郡  
楊溥序

欽定四庫全書

原序

欽定四庫全書

忠靖集卷一

明 夏原吉 撰

表

進太祖高皇帝實錄表

監修官戶部尚書臣夏原吉總裁官翰林院學士兼右  
春坊右庶子臣楊榮國子監祭酒兼翰林院侍講臣胡  
儼纂修官翰林院學士兼右春坊右諭德臣金幼孜翰

林院學士兼左春坊左諭德臣楊士奇翰林院侍講學士臣曾榮翰林院侍讀兼右春坊右贊善臣梁潛翰林院侍講兼左春坊左中允臣鄒緝翰林院侍講臣王英修撰臣余鼎臣羅汝敬刑部主事臣李時勉臣陳敬宗等欽奉聖旨修纂大明太祖聖神文武欽明啟運俊德成功統天大孝高皇帝實錄欽依修完謹奉表上進者臣夏原吉等誠惶誠恐稽首頓首上言伏以聖人啟運肇萬世之鴻基國史纂書示百王之大法必憑紀錄垂

法後來故典謨載堯舜之言方冊布文武之政古今通  
義昭晰如斯矧創業垂統而茂建於豐功又繼天立極  
以聿隆乎至治欲揚休美謹在編修欽惟太祖聖神文  
武欽明啟運俊德成功統天大孝高皇帝天地合德日  
月同明膺景命而隆興握貞符而御歷義旗一舉豪傑  
景從仁聞四張州郡響應遂渡江而下姑孰乃定鼎而  
都金陵除舊布新安民靖亂風霆肅乎號令日星煥乎  
紀綱威武奮揚東面征而西面怨至仁不殺近者悅而

遠者來掃羣雄於呼吸之間拓四方於指顧之頃連城  
納款挈壺漿以迎師列土歸降崩厥角以稽首舉中原  
如拾芥蕩外寇若振枯拯烝庶于塗炭之中驅羣雄于  
沙漠之外不十年而成帝業混一統而主天民人紀肇  
修叙彝倫于既敷華風復正舉禮樂于重興山川鬼神  
莫不攸寧華夏蠻貊罔不率俾有過化存神之妙盡彌  
綸參贊之功身致太平卓冠百王之盛德兼文武超越  
六籍之聞况儉勤戒乎始終而謙敬純乎表裏宵衣旰

食日總覽于萬幾秋肅春溫時順體于四序是致雨暘  
時若歲穀屢登諸福畢臻天休滋至在位歷三十餘年  
之久升遐動萬方哀悼之心自古以來未有如斯之盛  
者也恭惟孝慈昭憲至仁文德承天順聖高皇后天生  
聖善克相肇基誕開文定之祥永協坤元之吉同符景  
運遂位中宮德邁嬪虞功超胥宇性情適闊睢之正子  
孫應麟趾之仁簡能造化之宜保合承天之慶政修宮  
闈化行家邦誕育聖躬茂承天眷自古后妃之隆莫盛

于斯者也欽惟皇帝陛下聖仁天賦睿德日新念達孝以尊親在繼志而述事聿頒修史之詔適當嗣位之初發蘭臺記註之文而徵以藩邸之副抽金匱石室之秘而考乎世家之藏爰纂錄以成書實仰賴于聖斷謂事貴直而文貴簡理必明而義必彰乃勅命乎儒臣重編劇于歲月臣等才非良史媿乏三長法遵舊章敢妄一筆惟洪鈞何能于繪畫而至德莫罄于名言煥乎文章表經世之大訓寫之琬琰作貽謀之永圖謹撰述太祖



聖神文武欽明啟運俊德成功統天大孝高皇帝實錄  
二百五十七卷計二百五十冊寶訓十五卷計十五冊  
謹伏闕上進臣等無任瞻天仰聖激切屏營之至謹奉  
表隨進以聞

永樂十六年五月初一日監修官戶部尚書臣夏原吉  
等謹上表

頌

河清 并序

永樂二年冬十二月十七日至永樂三年春正月十八日黃河水清凡數百里於是秦王及高平王相繼奉表稱賀上謙讓弗居羣臣固請咸謂不可不承天心以虛靈貺遂俯徇輿情受賀于奉天殿慶協神人歡騰朝野猗歟盛哉誠亘古以來非常之奇遇也臣伏念自古王者政平地出醴泉聖人在位海不揚波禎祥所見必有非偶然者矧今皇上以天縱聖神削平內難簡賢命良省刑薄賦恩覃乎遠邇德被乎蟲

魚至和氤氲充滿無間由是嘉禾生仁獸至野蠃成  
神龜出然猶未足以擅厥美迺至黃河水清綿亘數  
百里豈非天意欲以彰皇上之潔白一心澄清九有  
內體乾德外著陽剛故特以此而為休徵之應哉是  
蓋不獨為皇上一身之慶而且為華夏億兆民之慶  
不獨為朝廷今日之祥而且為宗社千萬世之祥矣  
臣原吉忝綴六卿獲瞻盛事雖匪才淺學莫克稱揚  
然忻忭之餘不容自默謹拜手稽首而獻頌曰

於皇太祖孔神孔武受命自天奄有下土綱陳紀立禮  
備樂明熙熙皞皞民樂太平龍馭上征作賓于帝羣姦  
肆欺構難生厲穆穆我皇應天順人嗣承寶厯大命維  
新迺揚聖謨迺闡舊制億兆歸心蠻夷奉贄餘褻屏息  
至和誕敷天錫靈貺用作真符既有嘉禾復有仁獸野  
圃神龜迭見先後所發未艾黃河載清亘數百里湛徹  
虛明華彩畢呈光輝交煥澡浴日星涵濡雲漢無汚不  
滌無垢不消無微不鑑無蘊不昭造化周旋孰為臻此

垂象從類以彰厥美繫皇秉心淵淨潔澄日新又新聖  
德孔宏爰熙庶務昭融洞徹光臨下土如彼日月體信  
達順上格于天天道不違因河以宣彼河斯清匪水所  
發維皇治功維皇心法治功心法曷徵于河源深流長  
遺祉之多聖子神孫繩繩繼繼於萬斯年永配天地

平安南

并序

聖天子以皇天眷顧之隆太祖高皇帝付託之重華  
夷臣民繫屬之深不容釋乃御大厯服典司神人綱

舉目張禮明樂備品物咸遂福祥並臻五年于茲矣而安南賊臣黎季犛暴其君魚肉其民侵逼鄰邦侮辱朝使皇上以海島蠻荒不可律以中國憲度誅贖罰久矣李犛不知悔禍益肆姦狂於是內而百官外而占城國名合辭請討皇上乃徇輿情命大將帥師征之中軍擣其中左軍折其翼右軍掎其角而占城舟師復扼其奔逸之路季犛自知罪在不赦冒死力抗然而上下解體兵敗身縛其脅從將領邊遠部

落悉皆蒲伏乞哀受命于吏請比內郡乃立都指揮  
布政按察諸司選用守令以撫安其衆累世逋寇一  
朝剪除報至闕庭內外稱慶臣按周宣王平淮夷唐  
太宗擒頡利當時文人咸形諸賦詠以紀宏休臣職  
備民曹敢不採摭事實揄揚帝載發為歌頌以顯示  
無極頌曰

於昭上帝眷命我皇上承大統下撫萬方孰危未寧孰  
昧未明敷我彝典俾各遂成肝食宵衣不自滿假方趾

圓臚咸藉陶冶萬山宗泰衆星拱北駢首弭志無思不  
服相彼安南稊米黑子敢爾跳梁干我天紀命將往問  
出車彭彭彼頑率醜奮臂以亢乃褻其徒雞翎是扼金  
鼓一鳴倒戈以北湯湯富良彼恃天塹我師飛越膽寒  
心顫土崩瓦解逃生無門草薶禽獮噍類罔存爰立司  
牧樹守設宰弔問無辜恤其饑餒乃旬乃宣于仁于禮  
簞食壺漿我皇久俟稽顙致詞始迷不知詎意今朝重  
覩漢儀歸語耄倪服我疆畎我怙我恃父母不遠仰祝



聖主億載萬年聖子神孫寶祚綿綿周伐淮夷江漢歌  
雅宋擒劉鋹凱歌獻社斯皆內地奚足揄揚矧茲駿功  
可無頌章爰撫事實載陳盛美勸忠聖頑垂示無已

瑞應騶虞

并序

恭惟皇帝陛下繼承大統克勤庶政聲教誕敷仁恩  
旁洽天地既位萬物自育而瑞應駢臻不可殫記乃  
宣德四年春滁之來安有騶虞二見于石固山南京  
守臣襄城伯臣李隆以之獻于闕下詔賜羣臣觀之

蓋猊首虎軀白質黑章修尾隅目而其性甚馴真盛世之瑞物也臣原吉退而稽諸載籍曰騶虞仁獸也天下太平人君有至信之德則應竊嘗考之往古惟見詠于周之詩人自時厥後千數百年之間曠焉莫之覩我朝自太祖高皇帝肇興鴻業至于太宗文皇帝紹承厥緒積德累仁至深至厚海內康寧四方無警然後騶虞迭出臣獲見焉及我皇上踐祚以來禮樂刑政號令法度之施一遵祖宗之舊與民為信無

所更革故和氣充周而茲仁獸復見于滁滁固畿內  
之地且又兩瑞並出匹休儷美何其盛哉聖德之所  
感孚皇天之所眷佑于此端可見矣昔者白雉獻于  
越裳天馬來自西域猶且紀諸策書見于歌詠傳誦  
至今矧茲嘉瑞出于中國畿內之近者乎是宜被之聲  
詩以昭聖德垂示無窮臣雖拙于文詞然躬覩盛美  
不敢以默謹拜手稽首而獻頌曰

惟我聖皇總統萬方禮樂明備治具畢張民安其所物

無疵癘和氣氤氲鍾為嘉瑞惟茲嘉瑞匪熊匪貌匪角  
匪鬣曰惟騶虞玄靈之文玉雪之質修尾回風雙瞳炯  
日饑不暴物行避生芻由心之仁匪人之驅神行電邁  
千里一息其性則然不以其力侶遊儷美同出一時不  
產他邦乃在郊畿守臣致之獻于丹闕自然馴伏聖情  
欣悅百辟環覩歡動明廷曰惟慈獸瑞世之徵惟瑞之  
徵惟天子聖聖德格天受天之慶惟慶之錫惟天子明  
聖壽齊天億千萬齡

瑞應白鳥

并序

皇帝臨御之五年實為宣德之四年廣東海陽民以  
二白鳥來獻進覽之次賜羣臣觀于廷雪質瓊姿玄  
眸玉喙怡然馴淑之態充然慈孝之心誠盛代之嘉  
禎太平之上瑞其出也豈偶然哉謹按瑞應圖曰帝  
王禮敬宗廟備于孝慈則白鳥見又曰帝王肅敬宗  
廟仁孝篤至則白鳥見欽惟我皇上稟聰明睿智之  
資備文武聖神之德自纂承丕緒以來夙夜孜孜勵

精圖治簡任賢俊而興修禮樂旌別淑慝以振立紀  
綱明罰慎刑期民無愁歎之聲薄賦輕徭冀野有謳  
歌之樂至于承事宗廟則尤嚴禮敬奉養聖母則篤  
盡孝誠無一事而不適中無一物而不得所是以穹  
祇昭格海宇清寧和氣充溢乎兩間皇風彌布乎六  
合凡諸福之祥諸物之瑞莫不駢臻疊至以應昌期  
然不能一二足也故此白鳥雙見于海陬而其民之  
愛戴乎上者不遠萬里貢于闕廷以兆我國家萬萬

年太平悠久之徵以昭我皇上萬萬年仁孝廣大之  
德猗歟盛哉臣叨列清班獲瞻竒瑞雖才識疎陋不  
足以稱揚盛美然欣忭之餘不能自默謹拜手稽首  
而獻頌曰

於昭我皇聖神文武纂承丕圖撫有九土九土奕奕兆  
姓蚩蚩匪弘治曷臻雍熙乃殫聖衷乃勤聖質宵分  
而衣日是而食旌別淑慝登崇俊良制禮作樂振紀立  
綱禮樂昭宣紀綱明肅惟賦惟刑是輕是恤百度既飭

庶績咸熙仰惟宗廟敢忘孝思孝思維何奉先追遠禴  
祠烝嘗一嚴禮典載惟聖母壽慶天齊致孝致養前聖  
曷希於周有昌於虞有舜皇心同之篤盡敬順敬順既  
篤聖德益隆穹祇昭格神明感通充充兩間和氣勃鬱  
靈貺薦臻嘉祥疊出乃歲己酉七月仲秋爰有雙鳥見  
于海陬雪質鮮明霜姿瑩潔修喙啄瓊玄眸點墨不驚  
而擾不暴而侵馴淑之態孝慈之心貯以雕籠羃以文  
帛遠駕星輶入貢天闕龍顏悅視臣鄰聚觀懽騰丹陛



喜溢金鑾惟此雙鳥實國之瑞聖壽以彰聖心以慰嗟  
嗟小兆叨際清時覩此嘉瑞贊詠敢稽惟皇聖明道超  
三五安輯羣黎繩其祖武惟皇聖明壽齊天地萬億子  
孫傳承無替

賦

麒麟

并序

永樂十二年秋榜葛剌國來朝獻麒麟今年秋麻林  
國復以麒麟來獻其形色與古之傳記所載及前所

獻者無異臣聞麒麟瑞物也中國有聖人則至昔軒  
轅時來游于囿成康之世見于郊藪是後未之聞也  
今兩歲之間而茲瑞載至則聖德之隆天眷之至實  
前古所未有也宜播之聲詩以傳示無極臣忝職地  
官屢覩盛美不揆蕪陋謹拜手稽首而獻賦曰

惟我皇之明聖兮膺天命而御極環六合以為家統四  
裔而混一化洽殊方仁覆萬物和氣所鍾禎祥疊出而  
仁瑞之獸所以復獻于今日也爾其滄海之濱瑞氣勃

鬱玄枵降精二儀合德熒光燭天輝耀赫奕山嶽為之  
炫映江海為之滋液百獸為之奔衛萬靈為之拱翼而  
麒麟于是生焉豐骨神異靈毳瑩潔霞明龍首雲擁鳳  
臆星眸眩兮焜耀龜文燦兮煜曄牛尾拂兮生風麝身  
動兮散雪蹴馬蹄兮香塵接腕聳肉角兮玉山貫額步  
無躑躅必中規而蹈矩聲無哮闐自協商而應律固不  
犯乎陷阱亦豈傷乎生物是以不奮而威不猛而烈虎  
豹見之遁藏犀兕遇之辟易封豨巨豨雖悍戾而誰美

麇麇豺貉顧旁午其何益彼漢廷之角端徒自誇其美  
而渥洼之神駿焉能與之匹茲實聖世之奇瑞匪有資  
于人力此所以海隅島夷不敢自逸乃梯山而航海于  
以獻于中國于是離遐陬道滄溟越重譯望帝京侑之  
以方物達之以至誠匪惟効職于王會蓋將昭德于聖  
明于是時也天門洞開袞龍在御瑞物既呈祥烟斯布  
散精彩于彤墀濯儀文于甘露或昂首而欲鳴或跪起  
而欲舞重瞳載顧百辟歡欣曰惟此獸希有之珍昔在

軒轅曾一來馴暨周成康郊數是臻歷千載而及茲乃  
有感于皇仁越期歲而再至實前古所未聞是宜播之  
聲詩勒之金石著盛治之無窮延休徵于莫極顧微臣  
之謏謏覩盛美而愉懌爰稽首而獻賦頌聖德于萬一  
贊

瑞象

并序

臣原吉稽首頓首言伏惟皇上以神聖大德受天明  
命統馭萬方海宇清寧福瑞咸集茲者占城國來貢

瑞象玉質鮮明雪花奇麗粲然星斗之文炳然雲霞  
之彩蠻夷酋長拜獻于金闕之前玉陛之下郁郁彬  
彬光彩照耀聖情怡悅臣民懽慶正當皇上建玉京  
成寶殿之日庶民子來謳歌鼓舞趨事効力不督而  
成嘉祥奇瑞紛紜而至况茲瑞象出于海外遐荒之  
地重譯而來曠古未有自今而見則所以昭皇上功  
業之廣大德化之遠孚以固萬萬年永久之鴻業以  
隆萬萬年一統之太平夫豈偶然之故哉昔者文王

作靈臺詩人詠歌不過游魚白鳥而漢世芝房赤雁  
亦見于樂歌宋太祖乾德中有馴象玉兔之瑞有司  
請製旗以郊太宗太平興國中宰臣請圖諸瑞物以  
昭盛治以我皇明觀之太平福瑞之盛豈不過于古  
昔萬萬也哉誠宜宣付史官命諸文學之臣參議典  
禮歌于樂章著于鑾旂圖于瑞牒郊祀宗廟以享神  
靈揚芳宣烈以昭萬世天下幸甚而臣愚昧幸蒙聖  
恩備位地官無以補報恭覩嘉瑞不勝懽忻謹拜手

稽首而獻贊曰

三階平萬國寧  
瑤光明瑞象呈霞文布體白凝玉雪花  
萬點圓粧瓊想當生時最奇異百神呵護宣光靈青天  
雲開月揚彩碧海鏡淨波流清應我聖皇德萬里來占  
城黃金為絡珠為瓔玉階獻之怡皇情瓊林遙映玉華  
麗瑞日下照祥光明皇德弘聖治成制禮作樂昭昇平  
麒麟生鸞鳳鳴牟麥遍野嘉禾登從茲萬萬年垂衣坐  
天庭小臣願效華封祝地久天長播頌聲





忠靖集卷一

欽定四庫全書

忠靖集卷二

明 夏原吉 撰

五言古詩

題梅石處士詩卷後

晉宋有明哲陶林相後先陶以菊自逸林以梅稱仙芳  
譽藹當代高名照遺編今我趙處士抱道希昔賢孑孑  
謝世故悠悠樂林泉買梅更買石栽布軒窓前梅兮肖

清白石兮表貞堅清白期不穢貞堅冀無諛歲晏萬物  
瘁梅芳石初鮮拉彼林下叟觴詠梅石邊詩成倚梅歌  
酒醉拂石眠歌聲落寒玉眠席分晴烟俯仰睂睫外細  
大徒誼誼詎如梅與石及我同一天所以永結託要躡  
陶林肩集賢諸大老交素知其然爰贈梅石號重賦梅  
石篇鏗鏘振金玉至今子孫傳恨予生太晚不能拜當  
年翹翹仰梅石作詩寫餘箋寫罷復展誦清風竦毛顛  
題常執中無息齋

天道何剛健運行若機旋晝夜弗暫息今古或無愆四  
時以代謝萬物資陶甄嗟哉果何如惟其一誠焉不見  
古君子體道心拳拳賢兮則希聖聖兮則希天兢兢著  
謨典亹亹垂詩篇宣尼歎逝水孟氏稱源泉禹陰分寸  
惜陶甓朝昏遷銛錙季子讀圓枕溫公眠所進雖各異  
所志同一堅睠彼蚩蚩氓相去霄壤懸靈臺既茫昧德  
基任摧顛高明邈難入汙下甘伏跼晚途或有悔疇能  
迓流年吾湘常氏子學古知其然高齋扁無息翼翼臨

江邊不華亦不隘非郭亦非廬軒憲貯經史几席羅毫  
箋端居究玄蹟終日惟乾乾德業遂精進聲華益昭宣  
徵書忽相迫試藝臨文淵琳琅有餘響隙吹胡能聯英  
英冠多士籍籍膺高銓暫別京國友遠泛端溪船民事  
固雜沓夙心敢云諉朝焉戴星出夕焉戴星還吏案無  
留牘琴堂弗聞鞭一篝照清夜典籍還窮研匪曰釣時  
譽所希在聖賢顧我何放曠百行無一全庸庸竊君祿  
華髮將垂肩感子名齋義自愧還自憐壯心日以鈍安

能重磨鑄願子慎終始勿謂百里牽鵬搏必九萬驥騁  
須三千矧今聖明世簡拔無私偏坦蕩青雲路會當恣  
高騫周覽上林春滿挹龍樓烟對揚吐奇蘊獻納攄忠  
虔躋民太和域致君唐虞前功名著青史耿耿千秋傳

題彭希益惜陰堂

星沙控荆湖屬邑十有二羅湘甲西北山水獨佳麗彭  
君生其間鍾此山水異襟宇既軒豁丰儀更清粹垂髫  
被庭訓詩禮日講肄諄諄期有成勉勉冀無墜豈謂霜

露嚴毒被椿木瘁彷徨痛遺業感慨念先志乾乾仰居  
諸耿耿忘食寐構堂名惜陰予以自箴勵朝斯萬卷開  
夕爾一篝繼探搜聖賢心玩索古今事毫芒靡或遺纖  
悉必精至時當大比秋跼槐赴鄉試聲華動場屋文藻  
賁同類惟君自持謙不欲早干位春闈暫垂翮卒業辟  
雍地清修日益勤聞與愈深詣嗟予素薄劣忝有鄉曲  
誼每瞻惜陰堂中心竊懷愧願言慎終始毋使虧一簣  
行當馭長風扶搖九天際宮花醉蒲萄黃金耀名字遠



追伊召心光輔堯舜治功成銘鼎彝芳譽永無替回視  
惜陰堂煌煌孰能企

諭饑鳥

饑鳥來屋頭軒然振雙翼啞啞向我啼其意欲得食我  
行顧我厨餘糗頗云積粲粲白如銀瑩瑩燥如炙足可  
療烏饑盡與非所惜緣以目前人困乏動千億賑恤未  
有方夙夜慨中赤况此所餘糗粒粒出民力我食尚懷  
愧飼烏寧不惕饑烏勿此啼山林有榛栗

冬日聞蛙

蓐收已回轅玄冥正司令草木盡黃落蟄蟲俯而靜爾  
蛙何從來悅焉失初性凌寒發狂聲聒聒莫知竟捕之  
良可矜聆之顧非正願爾深自默毋為駭時聽

題扇面莊子觀泉

銀潢半天來窈窕幾千尺空林送清聲遙壁蕩晴色炎  
晨坐披襟涼氣拍胃臆吁嗟南華翁高懷有誰識

泉州次吳中書韻

區區南閩來，莫英屢更易鞍馬。  
厭道途風霜改，締綌豈無林淵思。  
民瘼未痊革，引睇桐城樓。  
寒雲萬山白。

宿樵李天寧寺

息軫古招提，時維孟冬莫。  
天氣熙如春，宵蛩起幽訴。  
獨聆不能眠，披衣坐風露。  
緬懷踏歌人，翹翹亦何故。

武康縣

湖州武康縣，僻在羣山中。  
人稀官事少，土沃禾稼豐。  
蠶時戶戶箔，雞曉家家舂。  
鮮菱采秋夏，嫩笋庖春冬。  
塵幽

商寡集溪曲舟難通兒童拙市語父老高村容淳淳良  
可尚擾擾希能同媿無召杜吏重造朱陳風作詩慰我  
民政俗宜自隆

贈琴士李忠禮

偉哉太白孫英英越中士來作湘江遊光風曄蘭芷抱  
琴為予彈清音驚俗耳雖雖鳳鸞聲悠悠聖賢理他日  
遇鍾期毋慚奏流水

五言律詩

錢塘江

浩渺惟天濶茫洋與海通赭龕

二山名

分左右吳越界西

東鷗弄潮頭雪龍吟水面風鷗夷在何處試問打魚翁

經姑蘇

客路尚悠悠蘇臺暫繫舟酒旗迷柳岸商舶隘江流三  
讓祠何古千人石更幽可憐城下水莫洗館娃愁

寄友

憶昔會皇州壺觴日勸酬一時同作客萬里各經秋湘

浦西風棹燕山夜月樓無窮蕭索意兩地一般愁

憶別四首

憶別金陵日高堂曉拜辭諄諄垂訓語切切問歸期  
縮地嗟無術看雲謾賦詩聊憑問安字遠慰倚閭思

二

憶別金陵日那勝手足情汨縣棠棣雨腸斷鵲鵲聲  
姜被清宵冷璫璣何日迎願言知此意蚤促北來程

三

憶別金陵日吾兒歲始三見人容嶷嶷學語舌喃喃雖  
乏麒麟譽應無豚犬慙行當還帝里為汝說周南

四

憶別金陵日春風二月時求朋鶯語急送客燕飛遲北  
邸俄淹歲南歸未卜期遙遙天上友莫動暮雲思

東吳述懷三首

為客東吳郡秋過冬復深梅粧崑阜玉橘剪洞庭金顛  
倒還家夢彷徨應關心何時了王事蘭棹起歸音

二

為客東吳郡民艱日轉深撫躬慙食祿汗顏媿腰金願  
廣乾坤澤均濡草木心萬方歌至治永叶太平音

三

為客東吳郡年深情亦深每慙三省語常畏四知金落  
落誰青眼寥寥自赤心寄言天上友雁到好傳音

題醫者蔣彥升鳳山書屋

幽居對鳳臺鳳去幾時來濟世書千卷怡神酒一杯秋



風橘顆熟春雨杏花開自是縣壺侶都人莫浪猜

寓雲居菴次韻答聯上人

誰關雲居境依稀古化城獅柑霜過熟鳳竹雨來青石  
悟禪中語鐘收飯後聲我來臨絕頂一覽小蓬瀛

泊金沙洲

晚泊金沙洲曉登洲上樓雲峯隨處好烟浪拍天浮掃  
壁看遺墨憑欄數過舟家山應不遠此地且優游

客興

去住何無定朝西莫復東姓名輕草木容貌熟兒童安  
得尋陶令相攜訪遠公林香新藕白笑詠虎溪風

到家後書懷

六載宦神州今歸覲祖丘眼看前輩少指點後生稠松  
菊從荒穢壺觴且勸酬鶯花明上苑又駕建康舟

登范公亭

偶上范公亭亭幽感慨生竹添今歲笋塵掩昔年藥老  
蠹隨人化孤禽向客鳴欄傾不堪倚惆悵下階行

自歎

少小頗聰明年來頓不成目嫌書字細耳恨語聲輕對  
酒渾無趣逢人屢忘名何如漢疏傳林下樂餘生

挽高主事母原氏

板輿迎養日綵服奉觴時春色凝萱樹秋香滿桂枝昊  
天何不弔玄壤遽長辭杳杳靈輶去三山草木悲

挽兵部侍郎盧公

偉矣盧司馬南州第一流龍庭深眷顧雲路久遨遊忽

感槐南夢真成水上漚孤兒何所恃永抱蓼莪愁

五言排律

聖德瑞應詩

永樂己亥秋海外忽魯謨斯等國遣使來進麒麟獅

子天馬文豹紫象駝雞

昂首高  
七尺

福祿

似駝而花  
文可愛

靈羊

尾大者重二十餘斤  
行則以車載其尾

長角馬哈獸

角長  
過身

五色鸚鵡等

鳥又交趾進白鳥山鳳三尾龜等物賜觀于庭承制

賦此

聖主膺乾運垂衣馭八區道隆堯舜比功茂禹湯俱蕩  
蕩三邊肅熙熙兆姓娛普天歌至治率土發靈儲爰有  
諸蕃國能忘萬里途隨槎超瀚漫獻瑞效勤渠渺渺來  
中夏惓惓覲帝居麒麟呈玉陛獅子貢金鋪紫象靈山  
種驊騮渥水駒駝雞同鸞鷟文豹擬騶虞福祿身紆錦  
靈羊尾載車霜姿獷更異長角獸尤殊綵檻奇音鳥雕  
籠雪色烏玄龜三尾曳山鳳五花敷日上龍墀麗風回  
鳳閣迂禮官躬典設蕃使肅奔趨仙掌開丹宸祥烟散

紫衝重瞳欣一顧百辟震三呼茲豈尋常致端由治化  
孚既將昭帝德尤足壯神都炎漢何能擬姬周莫並驅  
拜瞻嗟慶幸稱讚媿荒疎惟願皇風洽仍祈化日舒鴻  
圖千載固聖壽萬年餘

送李郎中新歸南陽省墓

南陽有佳士年富才華充壁水暫遊總天曹遽登庸試  
事建寧幕頤情武夷峯能聲沸衆口芳譽聞宸聰徵還  
鳳墀下超任烏臺中戔戔冠金豸表表乘玉驄豺羣頓

掃跡鼠穴無畱蹤漢桓讓先轡唐溫仰高風俄轉虞衡  
郎力贊冬官工政績日益著秩祿時尤隆緬懷三釜榮  
弗逮雙親躬遑遑風木悲耿耿羹牆容九京渺何處萬  
感徒填胷濡毫寫中素叫閤謁重瞳松楸許歸省椿萱  
更褒崇鸞誥絢五色天章炳雙龍存歿總光被古今實  
希逢百拜謝丹闕三祝效華封驅車向晨出祖帳如雲  
蔽浩飲倒鸚鵡高歌遏冥鴻都忘去路遙共喜歸興濃  
到家擬何時屈指應初冬錦衣照丘壠竹馬喧兒童故

舊遠問遺親姻競過從雞肥酒正熟樂極情曷窮第念  
丈夫志不與流輩同凌摩必霄漢棲息羞蒿蓬聖朝況  
當宁小大咸獻功展墓苟云畢趨朝敢辭匆亟駕青雲  
翼來覲黃金宮及時樹勲業努力全孝忠嗟哉畫錦堂  
豈獨韓魏公

題魯林懷思圖

宋德中衰日君家南渡時岱宗雲鬱鬱浙水路遲遲豈  
意僑居地真成永世基祖林千里隔族派一支離喜有



賢孫子能承宣父規家聲衢再振宦業魯無差準也尤  
人傑榮哉遇主知容臺司禮樂朝列仰風儀爰感詩書  
澤深懷水木悲迢迢盼洙泗耿耿夢防尼圖寫真人筆  
文擣學士辭既將舒繯繯還足警澆漓顧我何為者勞  
君索賦詩竊惟先聖裔敢以衆人期願謹過庭訓毋忘  
報國思光前仍裕後千載令名垂

詠慈烏

我愛慈烏好慈烏孝且靈親恩思返哺人事為先鳴沐

雨縉衣潔騫風墨翅輕白鷗非所侶玄鳥頗堪朋萃立  
虞庭異羣飛柳第榮吻傷新邑號栢集著臺名世罕雌  
雄辨人惟孝義稱嗟哉梟與獍視爾媿何勝

忠靖集卷二

欽定四庫全書

忠靖集卷三

明 夏原吉 撰

七言古詩

欽和御製元夕觀燈詩

皇明受命基圖隆挺生太祖真豪雄手提一旅淮南起  
指顧六合妖氛空三綱再張九鼎奠萬姓子附諸侯崇  
天威遠振沙漠外陽光直麗扶桑東神功聖德邁五帝

文謨武烈超三宗九重弼亮盡賢俊庶職甄別無凡庸  
時清化洽頌聲作弗問遠邇同泐泐握符御歷餘四紀  
創業垂統無終窮我皇繼體主神器勵精圖治心忡忡  
齊莊中正奉天道寬仁恭儉勤民功九區平寧遂生息  
萬方熙皞無憂恫茲惟歲首值佳節天清氣朗春融融  
鰲峰倏忽聳丹陛雲嶂突兀撐高穹浮屠寶殿更奇絕  
遙瞻彷彿靈山同金蓮萬朵吐清夜森森景象生光中  
教坊謹譁奏百戲舞衫歌袖飄青紅六街禁弛九闌關

衣冠雲集笙簫鼓皇恩如天更開宴霞漿香送龍樓風  
羣僚百辟何慶幸明時盛事年年逢况臣居位食厚祿  
庸庸固有涓埃忠虞廷賡歌今喜見願備九奏諧歌工  
鞠躬百拜向金闕上祈聖壽高義農巍巍宗社磐石固  
穰穰年穀田疇豐奇祥嘉瑞日輯集惟民惟物成雍雍  
洪熙乙巳秋仲賜觀內苑珍禽奇獸應制賦

六龍初御乾坤肅玉燭和調民物育爰開禁籞集廷臣  
少肆餘閑閱奇畜時維秋仲天氣清纖塵不起香風輕

虞官圉宰雜遯進珍禽瑞獸紛紜呈狡狴側踞真雄猛  
鉤爪金毛睛炯炯彩毬戲罷拂霜髯百獸潛窺敢馳騁  
須臾玄鹿來軒墀豐肌黥黠猶烏犀若非食野霑煤雨  
應是尋泉墮墨池雙羊繼出仍珍美腹若垂囊背如砥  
煌煌寶轡輕籠頭軋軋朱輪低載尾花陰小大霜姿殫  
金環約項聲隆隆然盤旋倏忽作人立何殊雪洞飛來仙  
又看福祿并神鹿毛質鮮龐實靈物羚羊緩步蒼苔邊  
修角撐空亦奇獨桺中玉鼠潔且馴朱櫻貫目脂塗唇

想應竊餌瓊芝足故看銀袍覲紫宸  
駝雞聳立誰其侶駢趾青瞳高尺許  
或時振翼將何如志在衝霄學鵬舉  
雕籠鸚鵡色更奇細觀熟玩心忘疲  
呈祥雖未銜圖瑞調舌應能唱壽詞  
三三兩兩賓郎雀短喙珊瑚新琢削  
飛翔寶檻恣喧呼似欲臨風脫金鑰  
徘徊重覩花斑雞冠丹頰翠衣裳  
縚是誰巧把晴空雪散作身章若綴璫  
載欣載羨雙鳩鳥質傳鉛花光皎皎  
雄雌並立清颺前貞靜幽閑一何好  
多情尤有白晝看雙看畫得天然殊

從今京兆多才思對此應慙畫不如盆池一物龜相類  
出沒清波名玳瑁錦鱗日映光陸離誰數南溟紫文貝  
吁嗟致此誠非常皆由聖德通遐方遐方感慕貢珍異  
故茲苑囿多輝光我皇繼體朝羣辟螻蟻微臣幸供職  
如斯一一承恩觀拜舞金門喜何極願言聖德超虞唐  
普天率土咸來王諸祥畢集四靈至千秋萬歲皇圖昌

題黃主事璿感螺詩卷

璿四川人性孝謹年十二時祖母患煩渴思螺湯時



嚴冬家人徧覓無所得璿乃戚然攜篋走南沖塘破  
氷探索得數十枚歸作湯奉祖母病遂愈人以為孝  
感所致為作感螺詩卷美之洪熙秋璿為戶部主事  
持以求詩為賦此

蜀山突兀高嵩衡蜀江浩渺連巴荆儲精毓秀產多士  
中有孝子璿其名方當齠齡家居日祖母遘疾乖天和  
參苓屢進莫一瘥存加煩渴思田螺田螺自是泥中物  
僻沼荒池深汨沒矧維冬冷盡蟄藏挾貝囊金何處驚

慈嚴戚戚璿心傷攜筐獨走南沖塘塘深水濶凍已合  
玻璃萬頃生寒光璿兮遽擲風前履踏碎水花蹴泥滓  
迴旋探索窮塘坳忽有羣螺來觸趾且欣且拾登筠筐  
恍如坐獲千明璫持歸便促家人饌苾芬香味聞高堂  
高堂老母思正切一歎煩局若開鑄百骸九竅生清涼  
二豎三蟲走顛蹙吁嗟如此豈偶然實由誠孝通于天  
天通故俾螺冬出螺出須令母疾痊孟宗乞笋號霜竹  
王祥求魚臥冰瀆二賢孝行誰與倫千載惟璿繼芳躅

况璿蚤已窮經史射策金門拜天子只今列職民曹郎  
卓卓能聲在人耳願言自此加勉旃惟忠惟孝期兩全  
我雖老鈍不能為爾製佳什尚當拭目看爾雲路高飛  
騫

題頤菴胡祭酒先生玉筍白雲圖卷

頤菴先生古君子德行文章當世美晨攜玉筍白雲圖  
訪我金臺官署裏自言先世多遺德卜居遠在金川側  
金川何處最清奇玉筍岩堯插天極雲收萬朵芙蓉青

雨餘百道銀潢傾陰巖月冷玉龍蟄陽坡春煖金牛耕  
蕭家峽口尤奇麗快若飛鵝舞空際泥江更抱伏虎形  
瓦橋重展遊蛇勢祖宗體魄此地藏松楸桑梓森相望  
子孫奕奕藉餘蔭讀書食祿門庭光偶因海宇風塵迫  
遂向洪都問田宅緬懷玉筍不可親但見遙空雲白白  
雲飛白白其柰何先塋正在山之阿林鳥泣雨下喬木  
野猿叫月懸春蘿矧惟宦轍方驅涉未暇栖栖理家牒  
聊憑縑素寄遐思用詔兒孫知祖業君其為我為歌詩

大書圖尾君母辭他年倘遂懸車樂展圖一玩紆心思  
我聞此言聲欲咽復觀此圖腸欲熱水木本源人共知  
誰似先生孝心切願言移孝忠吾皇致時熙皞超虞唐  
白頭稽首謝丹闕清風一棹歸故鄉金川玉笥重登眺  
西山南浦閒耕釣此時此樂誰能如丘壠州閭總榮耀  
顧予薄劣無長才鄙詩不足開幽懷還君畫圖三歎息  
好風颯颯從天來

題傅澤民分桂軒

并序

余曩與澤民同業于四明丹崖史先生之門先生嘗云昔唐太史奏月中桂子落天台後三百年當應至宋六飛南渡吾祖衍本初得紅木犀于山阿獻之高宗植復古殿前仍製詩稱賞于是史氏以丹桂別他族今典教來湘泮池上復有桂一株是天副吾願望澤民得其意乃于此分一稚桂植書室前且曰先生之桂來自月中予之桂來自先生有所本矣因扁其書室曰分桂軒示不忘所傳也永樂癸未夏澤民由

水衡官擢監察御史暇日攜分桂軒詩卷索題予既知其由不敢以拙鈍拒遂撫其牋以塞責

粵昔丹桂生蟾宮天香散漫飄穹窿世人仰望莫能折  
舉頭每欲排天風後來仙子不自惜呵吒銀蟾鼓雲翼  
銜將桂子落天台要使人間共培植天台一種三百年  
鬼神隱護人莫傳史家先世積德厚得從此地更移遷  
當時不敢自娛賞持向金門獻君長龍顏一笑栽殿前  
更灑宸章為優獎宸章煥赫事實殊史家桂澤當何如

敷榮發秀異他族流芳奕葉生名儒林林接踵為時起  
事業功名咸足美邇來復有紫崖翁碩德宏才古君子  
承恩典教來羅湘霏霏化雨菁莪芳祇緣遼渺丹崖遠  
心縣丹桂常徬徨徬徨未易乘風去日夕行吟泮池處  
彼蒼又若陰相之池上還存古桂樹色香雖匪丹崖濃  
根株却似丹崖豐丹崖桂澤裕厥後泮池桂澤將誰同  
芹邊弟子商崖裔重義崇仁心靡替稔知師意感師恩  
爰闢書軒分此桂吁嗟史翁何賢哉吁嗟傳君真奇才



史翁之桂由祖植傳君之桂從師來書軒况爾數椽小  
桂樹分來相映好秋風吹破丹砂堆萬斛清芬散龍腦  
傳君傳君日對茲豈惟玩彼香色奇是宜篤志勵所業  
光前振後期如師清狂蹋雪尋梅叟辛苦移家看竹友  
縱情矯物徒自疲師友傳承事何有傳君傳君重勉旃  
如今正是秋清天及時吐華著芳譽相期史氏同綿綿

桂林讀書處為賈郎中閔賦

湘江山水何清淑孕毓斯人美如玉幽居瀟灑一物無

環堵陰森盡嘉木既非陶門柳又非王家槐靈根產自  
廣寒窟老蟾銜出青雲來賈君先世好奇古掇芳裁向  
西風浦培壅灌溉期生成留作兒孫讀書所邇來樹老  
霜稜層枝頭開遍黃金英賈君觸物念遺澤寸心惓惓  
那能勝攜書遂入林間屋插架堆床千萬軸朝朝暮暮  
棲其中剔蠹翻芸苦心讀不圖珠玉富不羨鐘鼎榮但  
願瀾翻五車熟濟時載振箕裘名鶴書爭奈飛來早驚  
起鸞鳳九天表南陽臥榻閒秋霄莘野耕犁罷春曉趨

蹀碧玉殿出入黃金門回觀往日讀書處紅塵漠漠遍  
蹄輪吁嗟丈夫在斯世出處行藏了難計况今正際清  
明時首野安能老騏驎願言穩步青雲梯致君堯舜安  
黔黎功成解却朝天衣考槃再誦夫何遲

題祝少卿西山暮景圖

少卿卓犖人中英襟懷萬頃涵秋清夙承鶚薦典郡牧  
十年坐鎮滁陽城滁陽四面山如玉矗矗西山更奇獨  
根盤九地駭潛龍勢入層霄遏飛鷺少卿閱罷天閑駒

簿書不撓公堂虛捲簾靜對西山坐夕陽正在山之隅  
紅光闇淡照巖谷翠色冥濛覆林麓林邊散亂樵負薪  
巖畔縱橫牧騎犢須臾牧去樵歌杳翠斂紅銷山靜悄  
鳥旋松頂待歸雲雲護松窩邀宿鳥吁嗟此景世豈多  
匡廬泰華徒差我少卿遊宦此瞻眺桑榆觸目情如何  
我知少卿有高致不學區區流俗計西山暮景雖時看  
報國丹心逾自勵況今正際雍熙日碩德耆英蒐用急  
少卿素行簡宸衷肯放長歌考槃什願言晚節多康寧

致君堯舜安斯氓千年汗簡畱芳名西山亦爾增光榮  
送首德仁起復赴京

首君自是人中傑襟宇澄清湛秋月妙齡肄業湘黌中  
入室升堂邁同列後來識我羅江邊論交耿耿金石堅  
一簣照雨夜連榻百壺載酒朝同船鶚書忽向雲間落  
鵬運三千莫能遏扶搖直上九重天受職姑蘇問民瘼  
下車纔擬施砭劑椿萱萬里哀音至滿城桃李無心栽  
衰經歸來守親制寢苫枕塊甘毀瘠要竭衷情酬罔極

流光苦恨不少遲  
倏爾星霜又三易  
悽悽忍把祥琴調  
起治行李趨天朝  
西風江柳正蕭索  
遠來別我恩波橋  
吁嗟此別休灑淚  
忠孝由來無二致  
誠能移孝忠於君  
若是尤為孝之備  
況今正際清明日  
四海車書混同一  
鸞鳳不出銜瑞圖  
翠竹猗猗為誰實  
酌君桑落贈君詩  
送君高步黃金墀  
明年二月春風時  
我亦飛棹來京師  
與君重約鳳凰池  
青雲浩蕩長相期

乙酉八月二日吳江館遇京友惠斗酒

為小童所覆

故人遠自天上來，惠我一斗葡萄酒。愛之不敢容易開，  
呼童捧之當庭堦。珊瑚擊碎紅泥堆，珍珠迸入黃金杯。  
一行轉我腸，中雷再行掃我眉。間埃三行四行愁，壘摧  
五行六行春風回。桃花朵朵紅生腮，臙脂點點香凝頰。  
平原督郵走欲頽，青州從事驚相倩。客中有此真慰懷，  
更無夢到糟丘臺。柰何童子劣且騃，推壺仆地如翻淮。  
清光濕透爐邊灰，餘香散入堦前苔。為之恥兮徒有壘，  
醉無成兮誰其陪。是知飲啄皆天裁，毫分有數非人媒。

毫分有數非人媒彼童子兮何尤哉

觀打魚

楚天空濶重雲幕孤館風寒倍蕭索著鞭江上觀打魚  
消遣愁懷樂其樂吁嗟打魚果何似彷彿昆明池上事  
漁官獨坐萬斛舟船尾載鼓旗船頭揚旗擊鼓一何勇  
漁子舟人皆聳動鼓聲初發衆舟集鼓聲再發提網急  
鼓聲三發爭進取萬幅飛綸向空舉奔騰澎湃聲震驚  
浪花激作秋霜凝蛟龍避勢走欲仆河伯逃形懷戰懼



千鱗萬尾無所之一網牢籠莫知數縱橫巨細相倚疊  
山積沙頭如雪白漁人抖擻氣頗舒屈指團樂計千百  
均分各收受盪舟便回首眼網荻蘆邊鱸魚薦新酒酒  
酣更唱瀟湘歌兒童蟻聚聲相和且言今歲儘餘裕輸  
官給役從如何我來對此情莫極更向漁人剖胸臆汝  
今得魚誠解憂割髻鬢肉還生不成湯既祝網魯叟亦  
不網所以杜陵翁作歌為哀傷從今打魚休著眼莊惠  
濠梁樂無限

送李主事暹奉使西域

聖皇御極治化明海波不動邊塵清雕題椎髻盡入覲  
卉裳毳服咸來庭迢迢西域尤誠至職貢依時無或替  
聖心眷彼勤渠情特選才賢充報使地官主事關中英  
年青貌偉襟懷宏往時兩度使絕域能聲妙譽人咸稱  
今來再乘皇華節曉駕輶軒行紫陌繡衣郁郁飄天香  
四牡駉駉拖錦紉暮春三月楊飛花此時準擬過流沙  
宣威不挂義陽劍通道寧藉張騫槎高昌康居聊爾適

鄩善月支暫馬息星輶直駐于闐城天詔須頒大宛國  
大宛有馬皆龍駒于闐有玉皆璫璵皇恩遍布戎夷悅  
合辭入貢當何如黃琮蒼璧千金直騄駼驊驎五花飾  
想當旌旆言還時蕃使紛紛隨轍迹戎王祖道宮廬高  
蠻兒旋舞翻葡萄笳聲吹落關山月節旄振耀蟠花袍  
花袍不染流沙土文采曾霑天上雨歸來拂拭當彤墀  
百拜懽呼謁明主主心悅懌嘉忠勤隆隆恩寵應無倫  
願言努力重努力漢廷不負班將軍

瑞雪詩

并序

欽惟皇帝御宇以來天地清寧雨暘時若民康物阜  
政肅化行誠雍熙太平之盛世也乃宣德己酉冬仲  
十一月正一陽之將復日丁乙卯上天同雲瑞雪隨  
降蓋以彰來歲豐稔之兆天道亨應聖心悅怡遂製  
歌詩昭示臣下仍錫以酒饌共樂清時臣等叨列班  
行躬覩盛事雖薄德謏才不足以贊揚休美然欣忭  
之餘不容自默謹拜手稽首而獻詩曰

仲冬十一月將半天氣沍結泉流斷六丁赫怒風姨顛  
驅叱黎雲集霄漢須臾萬里色一同冥濛勃鬱仍丰茸  
天工乘此騁奇巧雕瓊削玉當長空長空迢迢四無接  
六出縱橫舞睂睫乍看勢若蝶穿花靜聽聲猶蠶食葉  
郊原窈窕銀為橋江湖爛熳鉛塗艘陰崖皎皎失苔蘚  
古樹茁茁生芒硝又疑何人煬鵲鷺毵毵飛來莫知數  
亦疑仙子開瓊樓淨掃瑤塵灑雲路况當午夜清明時  
影搖六合光離離梅邊老鶴驚且唳桂根玉兔窺還疑

是知此景非徒致實本吾皇隆聖治吾皇聖治符天心  
故感如斯豐稔瑞年豐歲稔邦家寧吾皇端拱唐虞廷  
覃恩布澤及遐邇制禮作樂昭昇平小臣何幸生斯世  
端笏垂紳列丹陛雖無往哲賡歌才敢忘封人三祝意  
封人三祝何為言願君壽福咸齊天興圖廣大磐石固  
神孫聖子傳綿綿

題攸縣曾榮宗夢雲圖

麟峰峭拔撐青旻峰頭縹緲多白雲有人結屋在其下

讀書樂道期娛親一朝薦達登臚仕遠別慈闈千萬里  
朝朝暮暮不能忘企仰雲峰痛心髓痛心遂爾勞夢魂  
飛揚忽與雲相親飄飄遠至慈闈下歡欣拜舞娛親身  
吁嗟雲兮本虛物磅礴輪囷多變復思親孝子今夢之  
無乃人心與雲觸雲無心有舒卷人有心無近遠無心  
有心一夢中孝感誰云不昭顯君不見狄梁公太行當  
日情何濃彼雲在望子在夢寥寥千載還同風顧予薄  
劣亦人子堂上萱親髮銀似如今遠作宦遊人感此中

情寧有已惟慮忠孝難兩全養親弗若榮親賢願君步  
武青雲上白雲雖遠終得與子相周旋

題蕭司務鼎和八葉流芳圖

廬陵蕭氏何其昌派從江左分來長繩繩繼繼引勿替  
貴聯八葉興于唐唐廷我我天宇靜八貴相承秉鈞柄  
簪纓赫奕充門閭聲譽芬芳謁觀聽祇慚我輩生太遲  
不見渠家全盛時寥寥仰止千載下據圖拭目看孫枝  
孫枝挺特真英器此日牛刀姑小試會當步武廊廟中



煜煜金章耀環珮  
耀環珮伊誰侔  
立功樹業光前修  
更須種德如山丘  
綿綿萬葉傳無休

戲贈淨慈寺僧恬靜卷

我從前日辭蓬萊  
飄飄飛上姑蘇臺  
臺前桂魄照秋水  
一碧萬頃無纖埃  
喜來遂發看山興  
擬度錢塘覽竒勝  
片帆若為天風畱  
一上雲居聽鐘磬  
雲居瀟灑雲飛飛  
中峰去後渺莫追  
就中忽遇老禪客  
自云近日來淨慈  
看峰修修散晴雪  
性海澄澄湛秋月  
煮茶揮麈共我談

四座霏霏飛玉屑我觀此僧不是尋常僧叢林當代應  
馳名何當攜取廬嶽去相尋修靜重締盟坐看五老香  
爐青

題吳敬安竹軒

湘江之曲湘山隩地曰東橋甚多竹低昂修短各有倫  
郁郁猗猗勝淇澳葉交加兮鸞鳳搏根鉤曲兮龍蛇蟠  
清聲振兮寒玉碎綠陰藹兮晴雲團吳公藉藉延陵族  
雅量雄襟邁流俗對茲戀戀不能違遂向林間結茅屋

數椽不隘亦不華竹軒扁額尤為嘉雨餘空翠入簾濕  
月明虛白穿窻斜有時絃琴竹下鼓琴聲竹韻同清古  
有時攜茶竹下烹茶烟竹霧相吞吐東籬徒訝黃花瘦  
孤山浪說寒梅癯河陽滿縣盡花樹成都連畝惟桑株  
何如吳公對此竹抱直含貞絕塵欲弋賢凜凜同高風  
六逸寥寥繼芳躅彼蒼獨恨難黃緣平安初報人已仙  
空堦寂寞下寒露幽篁蕭瑟搖蒼烟賢郎感慕心如燬  
九原深邈人難起臨軒躑躑聽竹聲聲款分明猶在耳

願言篤志窮遺經惟忠惟孝毋偏輕他年雲路高飛騰  
竹軒亦爾增光榮

題慈雲海上人泉石軒

我嘗駕鶴遊蓬山顛崖絕壁窮躋攀濯纓靈泉啖玉髓  
振褐瑤石收金丹別來倏忽歷年歲泉石膏肓無妙劑  
又從淮海逾錢塘要看溪山豁胸次越中忽遇慈上人  
號稱雲海超常倫構軒數楹傍巖谷清泉奇石皆天真  
有時挹泉洗禪足活活泉聲漱涼玉有時掃石移禪牀

綫綫苔痕皺晴綠銀蟾夜浴清輝生上人皎皎禪心凝  
碧雲曉出白衣澹上人冉冉禪身輕此泉豈與貪泉比  
此石尤非釣石儼泠泠不入許由瓢鑿鑿難為孫楚齒  
汲來竹底烹龍團白花浮光六月寒琢之松窻陪兔穎  
玄圭弄影三峯攢廬山一派飛千丈窅誰能日相向  
虎丘一片容千人蕭索何由坐其上是知上人居此軒  
清泉竒石常在前石能雲兮泉能雨上人清號寧虛傳  
我將乘風周八極未許長年坐此看泉石願言沛爾雲

海之慈波潤及天下均饒益

題湘山樵寓

湘人蕭規少遊吳中值亂不能歸遂家于彼今年踰  
八十有懷故鄉扁所居曰湘山樵寓聞予為鄉人扶  
杖來謁因求詩遂為賦此

扁舟常夏來姑蘇寥寥萍水交游疎有翁老大相過訪  
桃花染顏霜染鬚謂是非熊叟不釣磻溪魚謂是空桑  
子不把莘野鋤煮茶延坐問所以乃云我是幽潛徒本

來生長湘江側詩禮傳家有遺則早年酷厭流俗羣遂  
入湘山作樵客清泉白石學礪斤殘樗朽櫟聊充新風  
時一笛弄寒月日暮片席眠晴雲會稽太守了弗羨少  
室山人尤所賤此身只與溪山親養素含貞畢初願柰  
何陵谷忽變遷弱蓬不為狂飈憐東飄西泊失故所栖  
栖留滯吳城邊吳城嵯峨烟霧塞一住多年歸未得回  
觀往日樵游林桑梓迢迢天宇隔天宇隔情瞿瞿海籌  
滿屋頭毛枯望雲長羨飛鳥逝臨流深念遊魚徂聞君

亦是湘中士故爾相從話行止君能為我寫幽情庶免  
他年愧鄉里吁嗟翁兮胡爾言人生出處非偶然吳湘  
萬里雖異地吳湘一日還同天翁不見古豪傑掉臂常  
嫌穹壤窄倦來到處即為家那問青齊與吳越况翁舊  
作湘山樵心閒志逸身逍遙如今終老東吳地清風疊  
疊誰能高願翁永誦考槃什飛鳥游魚毋念及唐虞在  
上時雍熙會見褒書下州邑

題練溪草堂



練溪之地何高明練溪之水何清澄幽人架屋臨溪塍  
甕為牖兮樗為楹片簾高捲香風輕山禽水鳥從飛鳴  
有時客至忻然迎呼童便覓牀頭瓶瓶中有酒甘如飴  
溪中有魚肥可烹取魚酌酒舒幽情醉來那顧身歌傾  
日西客散柴扉扃竹牀移近梅花屏恬然一夢無人驚  
梁園金谷何足稱祇緣聖主思治平禮羅四設蒐賢英  
如君侑儻年尤青草堂豈得淹平生願言控翮高飛騰  
嘉謨嘉議為時呈致君端拱唐虞廷歸來再與溪山盟

歸來再與溪山盟庶幾出處全令名

題南溟息上人聽松軒

大雅久不作釣天寂無音繁聲急響徒亂耳涼風古意誰存心南溟道人獨爾得真趣掃却哇淫拂塵慮縛茅直向吳山巔繞屋森森種松樹天風時自天際來松聲畢發真奇哉清如寥寥老鶴唳碧落驚如忽忽萬馬奔黃埃又如瑤臺三千仙子朝帝闕環珮珊珊步明月瓊林十八學士登瀛洲軒蓋翩翩振金節南溟此際誰與

俱鉤簾宴坐心于于聲來在松聽在我我心還似松聲  
虛不抱焦尾琴不弄柯亭竹惟聽髯龍吟歲寒更奇獨  
愧予走俗走未休耳邊安得辭誼啾南溟南溟為我畱  
半榻尚期後日重來遊

烏夜啼

慈烏啞啞清夜啼飛來飛去無枝棲天空月冷聲慘切  
更深夜永情悲悽東家織婦年三五良人萬里操干櫓  
冬衣未寄春復臨機杼勞勞不勝苦耳邊忽聽慈烏聲

炎炎萬感焚中局掀襟拭淚罷機杼披簾促步趨前庭  
悲悲咽咽對鳥說莫向清宵學啼血妾夫別去三踰年  
魚鴈迢迢至今絕願鳥將妾相思情西飛啼向夫郎聽  
夫能聽兮妾情達妾情達兮夫心寧夫寧豈欲終忘  
恩義須期兩無報夫能努力樹功名白髮歸來未為晚  
題雲居先生遺像

神仙中人雲居翁秀氣原自仙華鍾蚤年即遠簪纓轂  
僑居靜挹林泉風羣書諸子既折衷內經脈訣尤研窮

活人要濟岐黃功不容二豎欺疲癯柰何晚厭人間蹤  
乘風頓返蓬萊宮寄茲清影尺素中睂疎目朗雙頰紅  
飄飄獨步誰能同商山舊有東園公我來相對語莫通  
舉頭悵望仙華峯舉頭悵望仙華峯雲深不見青芙蓉

題所翁龍

所翁所翁何多能毫端幻出真龍形杈枒雙角斲玄玉  
爛熳兩目搖金星我初見此昂藏勢未識騰衝霄漢意  
摩挲老眼再四觀漸覺蜿蜒有生氣緬想揮毫欲畫時

所翁應與龍相隨不然何以極此妙令人不敢臨淵窺  
願言珍默全神化莫學金陵空叱咤吾農歲計在夏秋  
此時望爾為霖澤天下

和胡祭酒雨中獨坐詩韻

連朝風雨泥濘深幽人不見心沈沈想應齋居有餘暇  
坐披卷籍窮古今過眼瀾翻五車熟却喜牀頭新酒綠  
開樽勸飲是何人好似顏家小銀鹿  
顏魯公家童名銀鹿載歌載  
酌三杯餘新詩百首皆親書封題寄我意何厚恍如十

二珊瑚株欣然便欲馳車馬走送詩壇共誇詫出門未  
定復入門無柰長空雨飛灑

舟行值雨

江風浩浩吹江柳碧流如瀉翻瓊玖扁舟一葉勢欲飛  
兩岸青山入雲走雨聲滴滴敲蓬鳴我居蓬底誰為情  
呼童洗盞酌新酒自歌自酌攻愁城愁城既破我亦醉  
謾擁輕衾歌枕睡夢回拭目推蓬看烟水茫茫不知處

小江漁釣

小江江水綠如酒兩岸春風舞垂柳老漁落魄一事無  
三尺綸竿長在手有時釣得縮項鰻隨緣沽酒供餘年  
不圖星辰動天闕醉來即藉羊裘眠

汨羅懷古

五月五日天氣晴古羅士庶思屈平聲金伐鼓集畫艦  
浩歌競渡招沈靈沈靈不返知何往楚國蕭蕭空草莽  
聊將一滴菖蒲漿灑向清波寄遐想


桃花灘



桃花灘上桃花開桃花灘水鳴春雷扁舟欲上不能上  
牽纜百丈何艱哉烝徒努力重努力不比尋常浪花激  
老夫設險有如斯過此搖搖隨所適

福祿曉鐘

四鄰膠膠雞亂鳴叢林衲子聲寒鯨載遲載促一百八  
松雲墮碧星河傾吁嗟人生能幾永在世無殊幻泡影  
悵然聽此不能眠起坐幽窻發深省



忠靖集卷三

欽定四庫全書

集部

忠靖集卷四至六

詳校官編修<sub>臣</sub>裴謙

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官助教<sub>臣</sub>胡子襄

謄錄貢生<sub>臣</sub>孔繼峰

欽定四庫全書

忠靖集卷四

明 夏原吉 撰

七言律詩

永樂庚寅春扈從之北京臨淮道中口占

邊塵不起海波澄萬乘時巡出帝京燕子風清仙仗肅  
杏花日煖繡旗明高年首謁均頒帛良吏郊迎屢問名  
鑾馭行將駐何處黃金臺畔舊王城

和胡學士冬至後六日扈從獵龍山同蹇尚書

諸公遊牛首山佛窟寺詩韻三首

山寺迢迢一徑微  
山中景趣世應稀  
花飛澗水驚魚躍  
風引松雲伴鶴歸  
朝士來遊無俗駕  
老僧畱語總禪機  
回鞭還從鑾輿後  
滿路天香暗襲衣

二

獵罷龍山日未斜  
更從佛窟訪烟霞  
半崖寒瀑如飛雪  
幾樹霜楓似著花  
茶熟地爐煨楮枲  
雲畱禪榻護袈裟

盤桓不盡登臨興並轡歸來浥露華

三

曉從獵騎過禪關蘿磴縈紆取次攀兜率巖深千古在

辟支佛去幾時還

山中有兜率巖乃辟支佛修道之處

風幡影動空濛外

雲磬聲聞紫翠間借問清修林下士六時禮罷有餘閒

題孔明像

當年高遜草廬中誰識先生是臥龍昭烈特勤三顧禮  
南夷頓服七擒功祇緣佐漢心逾切竟使吞吳恨莫窮

今拜遺容千載下不堪吟望永安宮

題赤壁圖

二客相從赤壁遊當時風景何悠悠山高月小岸影斷  
水落石出江聲流化鶴道士夢半夜聽簫嫠婦愁孤舟  
吁嗟此樂不可復覽圖重為曹瞞羞

謁三閭祠

先生見放事何如薪視椅桐梁棟樑忍使清心蒙濁垢  
寧將忠骨葬江魚西風楚國情無限落日滄浪恨有餘

我拜遺祠千古下  
摩挲石刻倍欷歔

詠獸吻

非熊非虎亦非羆  
頭角生成藉坎離  
不向草茅誇氣象  
直須廊廟著威儀  
昂昂飽歷風霜苦  
默默多承雨露滋  
寄語飛飛諸燕雀  
好來相伴莫相疑

問嫦娥

試將杯酒問嫦娥  
月殿迢迢路幾何  
玉斧修時誰幹運  
金蟾食後孰揩磨  
明皇秋夜遊來否  
太白當年捉得麼



我欲乘風攀桂子霓裳肯為舞婆娑

嫦娥答

獨宿蟾宮春復秋雲泥相隔路悠悠  
晦明有數非蟾食圓缺惟時豈斧修  
影捉水中人自醉象懸天上孰能遊  
欲攀桂子觀仙舞須覓靈槎犯斗牛

送禮部員外郎楊旭歸蜀省墓

京國長年振轡遊承恩今去省松楸  
上林鶯送春風酒平峽猿迎夜月舟  
題柱長卿真並駕登樓王粲更何愁

孝思展罷霜翎健蚤挾天飈覲冕旒

過太湖

滔滔綿亘五百里三萬六千餘頃寬衆瀆西來天設險  
三江東注海飛湍影搖霜橘金千樹光浸寒蟾玉一九  
欲問陶朱在何處白鷗無語水瀾漫

伴梅菊

每羨寒梅獨擅名誰知黃菊也崢嶸籬邊牆角秋冬景  
雪際霜餘金玉英晚節慙違元亮約歲寒同結老逋盟

寄言松竹休相妒三友何妨四友并

題陳希夷圖

聞說真人御九關騎驢一笑便還山頭中高掛蒼松頂  
足履深藏翠巘間白石綠莎長日暝清風明月四時閒  
吁嗟偽隱終南者何獨驅馳不憚煩

挽禮部郎中黃鍾父遜翁

并序

翁本況氏所生六歲值兵闔門被害鞠於里人黃氏  
生二子黃乏嗣翁命一子繼其後即鍾焉餘一子歸

宗以承況氏之業

不欣榮利樂林泉嘉遯龍岡七十年夜月一壺花下酒  
春風百畝隴頭田承家報國雙雛俊繼絕歸宗二姓全  
豈謂清宵遶鶴語楚猿愁殺白楊烟

慶少保戶部尚書黃宗豫尊翁八十八壽

人生七十古稀聞今喜先生近九旬雪鬢霜髯膺寵爵  
雲林烟岫樂閒身達尊不讓香山老碩望宜聯洛社賓  
他日繪圖修故事肯容樗朽廁簪紳

九日

去歲今朝侍北堂今年此日寓閩鄉  
紫萸黃菊故園好綠水青山客路長  
對酒不堪成獨酌吟詩聊用寫清狂  
明晨喔喔雞聲發何處登車何處航

登延平府明遠樓

危樓誰構憲臺東偶得登臨最上重  
萬井炊烟朝雨後四圍山色夕陽中  
窻紗掩映琅溪月簾幕飛揚劍浦風  
安得時間了公事重凭雕楯翫雲峯

擬福建鄉試

浩興推人入建遊棘闈正爾集儒流虹霓氣吐三千字  
奎壁光浮十二樓天下爭先看豹變榜中誰獨占鰲頭  
殷勤文苑司衡者莫使祥麟後馬牛

憩蘇州文正書院觀公所書伯夷頌碑

忠厚堂深客到稀時憑雕楯看穹碑銀鈎鐵畫中書字  
玉振金聲吏部辭千古讀來千古懼萬年立處萬年奇  
瀟瀟落日懷賢淚何獨襄陽石下垂

題荷峯雲隱圖

萬仞荷峯插漢青當年嘉遯若為情  
田園無限幽閑趣車馬不聞來往聲  
半榻松風雲臥冷一溪蘿月釣絲輕  
只今聖主求賢急林下安能老釣耕

菊花枕

採得東籬半畝秋裝成一枕著牀頭  
芳心不管鴛鴦妒清夢時憑蝴蝶遊  
絕域重明無足礙天孫七寶豈能儔  
飲餘攜傍梅花臥玉鈿金錢眩醉眸

蘆花被

似絮如雲覆遠洲  
掃來拍拍入衾裯  
夜窻月映滿身雪  
曉枕風生一夢秋  
蜀錦吳綾慙艷麗  
純綿毳毳讓輕柔  
寄言翰苑風流客  
還有新詩肯換不

玄兔

偷食嫦娥染鬢膏  
便披玄褐褪銀袍  
狡狴乍覩潛三窟  
老鶴遙窺避九臯  
晝浴墨池增瑞色  
曉行雪地見秋毫  
信知此物非常有  
贊詠惟慙句不高



插花瓶

膽量洪深體態豐不親俗士與村翁  
金猊瑞鴨常相伴  
淨几明窻賸見容  
渴至欲吞三峽水  
興來遍走百花叢  
何當淨滌身心垢  
大士巖前究色空

挽故文淵閣大學士胡公光大二首

黑頭染翰侍宸旒  
煜煜才華眷顧優  
豈謂藏舟移夜壑  
遽令行轍避西州  
人間名著黃金榜  
天上文懸白玉樓  
此日臨風歌楚些  
不堪嗚咽淚橫流

二

候直曾占日影墀騎鯨今作月臺仙閣中遺像神如在  
案上餘文墨尚鮮終始哀榮遭聖主邇遐弔醉走羣賢  
諸郎更喜多英俊肯墜箕裘不世傳

題尚書郁公心遠樓

不羨齊雲與摘星小樓數尺自經營琴書有趣天君泰  
車馬無聲地位清翠剪松雲來几席香飄花雨度軒楹  
南山況是多佳氣相對悠然萬境明

登武夷山

觀風偶入武夷行  
隨處登臨隨處情  
燒藥爐空無鶴守  
讀書壇古有猿鳴  
峯雲隱隱三尖碧  
溪水盤盤九曲清  
安得窮躋最高頂  
相尋仙子問長生

尤溪謁文公先生祠

尤溪一派自尼分  
毓秀儲精此降神  
攘斥異端扶正教  
恢弘聖道淑斯民  
源頭活水通洙泗  
門地清風藹建閩  
愧我疎庸生已晚  
謾瞻遺像薦新蘋

題呂員外棠岱岳春雲圖

岱嶽差我聳碧空春來雲氣幾千重輪囷曉度天門外

縹緲時懸日觀東

天門日觀皆岱嶽勝境

豈是無心閑出岫應知

有意欲從龍迢迢遊宦思親者何獨憑高望不窮

題京口醫者蔣彥恒思濟堂卷

思濟堂開古潤傍活人有術似長桑丹成龍虎藏金鼎  
藥配君臣貯綵囊盛業今傳三世美高名遠播兩京香  
顧予潦倒霜侵鬢肯授仙家却老方

挽祝太僕孟獻

故鄉親友久飄零，幸識先生在帝京。  
氣宇軒昂高北斗，詞源洋溢隘東瀛。  
看花每並春風轡，話舊常同夜雨檠。  
豈意哲人天奪早，屋梁落月漫傷情。

追悼故同寅秦郎中

君住關西我住湘，偶從京國共翱翔。  
英英氣宇橫霄漢，煜煜聲華振廟堂。  
粉署夜談燈照雨，金門曉覲帽飛霜。  
嗚呼顏色今何在，落月蕭蕭滿屋梁。

過采石

采石江頭夜艤舟  
攬衣乘興步江樓  
一天灝氣凝風露  
萬頃寒波浸斗牛  
燒燭題詩陳往事  
倒囊沽酒滌新愁  
錦袍學士知何在  
明月娟娟照古丘

小孤山

我愛茲山異衆山  
峩峩獨峙海門關  
匡廬遠度天風勁  
巫峽潛通地脈寒  
上下客舟愁涉險  
往來鷗鳥喜餘閑  
何時學得燃犀術  
下燭神龍萬丈間

鴈字

鬣鬣霜毫抹綠烟等閑畫破碧雲箋半真不草長空外  
欲斷仍連落照邊體妙自殊沙上跡勢高寧似酒中顛  
恨無楮素如天濶寫出黃庭與世傳

挽柳莊袁先生

先生蚤踐菊村蹤

乃翁號菊村

學富才充氣宇雄滄海遇仙

傳異術金臺承詔謁重瞳

廷玉嘗遇僧號別古崖授以風鑑之術洪武中詣金臺潛

郎上謁有重瞳  
太平真主之語

奉祈禮寺恩榮渥解組鄞江壽考終愧

我疎庸相見晚束芻聊酌柳莊風

挽工部尚書宋公

黑髮為官到白頭英名偉績罕能侔  
兩乘驄馬登烏府四轉清階立鳳樓  
晚節正期身殉國深宵豈謂壑移舟  
遙遙旅櫬歸三峽江水無聲猿夜愁

福寧縣次吳中書韻

金飈刮地雨初晴使者飛颿至海城  
寶劍光搖秋水碧繡衣香壓瘴烟清  
旣從閭井詢民瘼復向屯營問戍情



地僻人淳無箇事但聞村老話昇平

寄弟

一身為客寓神京兩弟隨親在楚城魚鴈常時傳別字  
塤篲何日奏和聲願勤燈火寒窗業勿負箕裘先世名  
歲晚歸來姜被煖載歌棠棣話心情

送參議李守中南歸養病

宦轍驅馳數十年今承優詔許南還黃堂粉署無新夢  
綠水青山有舊緣扶老況存金鼎藥怡情猶剩白雲篇

何時我亦辭塵鞅載酒尋君岳麓邊

和冬官尚書黃公見寄詩韻

昔年杖節撫南夷瘴雨炎風肯憚危  
每夜篝燈籌國事隨時焚草畏人知  
蠻方已喜標銅柱漢殿重看賜玉枝

漢武帝得西那國玉枝以賜近臣年高者恨乏堅砭付曩老  
為鐫德政去思

詩黃公撫鎮交趾二十餘年蠻夷悅服其哀老驛召還京俾復舊任故詩意上念云云

午日侍宴

榴雨初收午日晴九天開宴集簪纓  
森森劍珮環龍袞

嫋嫋笙歌奏鹿鳴酒進黃封金潋灩花簪烏帽翠輕盈  
百僚感戴歡何極拜舞金鑾謝聖明

永樂辛卯將用兵于沙漠二月大閱于北京城

東時翰林金侍講有詩因次其韻

羽書飛召四方兵百萬貔貅集帝城赫赫氣橫魚麗陣  
桓桓威稱虎賁名鑾輿曉閱霜凝蓋鐵騎雲屯風颺旌  
此去烽烟應盡掃薇垣長見泰階平

和胡學士扈從獵陽山詩韻

陽山遠在上林東原隰勻勻獸所同萬乘時田親閱騎  
六師曉從競腰弓霜飛玉盾連營白日照龍旂夾仗紅  
較藝場中誰最勝駕前英衛萬夫雄

又次胡學士扈從獵武岡山詩韻

六龍曉駕不驚塵林壑先生草木春道上迎鑾田舍叟  
輦前獻賦玉堂臣致禽自合三驅典愛物同推一視仁  
賸喜太平多瑞應騶虞出後更麒麟

兩蒙恩賜倭扇欣戴之餘賦此

遠夷効職呈倭扇聖主覃恩賜侍臣捧處九霄紅日近  
揮來一片白雲新蒲葵側足瞻餘影蟬雀甘心立後塵  
蕩蕩皇風從此播炎氛清絕萬方春

至日喜雪和胡祭酒韻

測候無煩六琯灰一陽已趁雪飛來龍墀耿耿銀鋪地  
鳳闕稜稜玉甃臺柳絮漫從春後舞梅花喜共臘前開  
殷勤館閣諸英俊好和新詩送酒杯

元夜賜宴觀燈應制

聖皇御極泰階平閭闔宏開夜散燈焰吐鰲峯星萬點  
光搖鳳闕月三更千官縱翫班頻越百戲爭呈藝絕精  
自愧疎庸何慶幸年年此夕荷恩榮

午日賜觀擊毬射柳詩

奏罷南薰駕六龍從容閱武禁城東旌旗隱映花間日  
鼓吹喧轟柳外風百步葉穿弓滿月兩朋毬擊馬飛空  
從臣忻覩呈歌頌吉日車攻詎比隆

應制賦黃鸝鵲詩二首

色正中央世所奇絳膺丹趾古尤稀  
遠乘花雨辭滇水  
高挹天香覲帝闈  
上苑金鶯難並侶  
碧霄黃鵠喜聯飛  
信斯瑞物非徒致  
惟我皇仁被九圍

二

皇仁廣被世雍熙  
南服祥禽貢玉墀  
菊羽煌煌金色燦  
星眸炯炯碧光垂  
致身幸際千年運  
調舌能歌萬壽詞  
好向丹山邀彩鳳  
銜圖共獻太平時

送御史蔣暹乞假歸省金臺諸友詩圖贈餞

客裏頻傳送客鐘  
豈知屨質已成翁  
狂歌強作江南調  
薄餞聊隨薊北風  
柑熟洞庭人足到  
月明湘水夢誰同  
凌雲健翮須時奮  
去去毋淹枳棘叢

題人影

不言不語過平生  
步步相隨似有情  
長向燈前同靜坐  
每於月下共閒行  
昨朝離去天將暝  
今日歸來雨又晴  
最是行藏堪愛處  
顯身須要待時明



忠靖集卷四